

IPA a celebra apertura oficial di aña academico 2013-2014



ORANJESTAD (AAN): Diabierna dia 20 di september 2013 Instituto Pedagogico Arubano (IPA) a celebra apertura oficial di aña academico 2013-2014. E apertura a marca e comienso oficial caminda a presenta e plannan innovativo y ambicion extraordinario di e instituto pa e aña nobo. Alavez a reflexiona riba e reto y logronan di e aña anterior.

Durante e apertura directora general, drs. Ava Thodé, a presenta e tema di IPA su aña academico 2013-2014 titula: Logra innovacion y cambio mediante autoconsciencia. Den su discurso drs. Thodé a menciona cu IPA a cumpli cu un di e metanan di mas grandi cu nan a pone nan dilanti; IPA ta cumpli cu e exigencianan di calidad di e organo di acreditacion di Hulanda cu yama Nederlands Vlaams Accreditatie Organizatie (NVAO).

Segun drs. Thodé un di e retonan pa e proximo añanan ta pa mantene e calidad di nos enseñansa y hasta sigui aumenta e calidad pa forma maestronan excelente. Alavez IPA kier cumpli cu e demanda pa percura cu tin suficiente maestro pa enseñansa preparatorio, basico y unda e demanda ta hopi grandi pa enseñansa avansa. Aumenta e cantidad di estudionan y siña cu otro, di otro pa medio di cooperacion cu otro universidad y enseñansa superior cu sosten di medionan tecnologico nobo ta un di prioridadnan di IPA.

Hisa e calidad di siñamento (teaching and learning) cu e resultado cu e docente y futuro maestronan ta bira berdadero profesionalnan den siña. Tambe drs. Thodé a splica kico ta e motivacion pa escogencia di e tema di aña di IPA:

“Hopi innovacion no ta logra pasobra e concentracion hopi biaha ta riba e structuranan, metodonan, medionan, bukinan, etc.

Pero e factor mas importante ta e maestro, sin dje no ta logra innovacion. E miho caminda pa cuminsa ta pa refleha y samina nos propio experiencia. Pa por logra cambio y innovacion nos mester bira maestronan consciente. Nos mester cuminsa refleha riba nos mes accion, actitud y habitonan. Nos mester cuminsa na nos mes. Rond mundo ta bira mas evidente cu: “The best place to begin is always with yourself. Your own experiences, frustrations, ideals, and sense of self are the crucial starting points”.

Como invitado special, dr. Marilyn Robb, a enfoca riba e concepto autoconsciencia. El a splica cu sin autoconsciencia no lo bin cambio ni innovacion specialmente den e sistema di educacion. Segun dr. Robb tin varios pregunta cu nos mester haya contesta riba nan p’asina utiliza e autoconsciencia aki pa por logra innovacion y cambio. E pregunta principal ta ‘con bo persona por ta e cambio?’. Segun dr. Robb pa por contesta e pregunta aki mester haya contesta riba tres otro pregunta cual ta: Kico ta nifica autoconsciencia?

Kico bo mester ta consciente di dje pa por logra cambio y innovacion? Cua ta e innovacion y cambio cu bo kier mira? Segun dr. Robb e reto pa yega na e contesta ta consisti di algun paso entre otro; desaroyo propio di autoconsciencia, siña maneha emocion, e habilidad pa reconoce y reacciona di un forma adecuado riba otro persona su emocion y accion, samina bo norma y balor pa determina cua ta e

cambionan cu bo kier mira y haci palabracion cu bo mes pa no ‘give up’ tanten cu bo no mira e cambio.

E speranza ta cu bo lo haya contesta riba e preguntanan door di aplica e pasonan den bo trabao, den bo compromiso y dedicacion pa cambia bo mes, den comunidad y schoolnan y den e sentido di conscientacion aumenta di bo mes y otro. Dr. Robb a finalisa su discurso cu un mensahe inspirativo “Let this year be the year that you embrace these practices wholeheartedly. I guarantee you that you will be able to be the change you want to see and therefore begin to see that change impacting your environment”.

Tabata sumamente placentero di mira e presentacionnan di diferente grupo di studiantenan di IPA. E presentacionnan tabata den cuadro di e tema di e aña academico aki. A otorga certificado di Propedeuse na e studiantenan cu a termina e prome aña di nan estudio cu exito. Directora adunto di Departamento di Estudio Inicial y decaan Ingrid Captain a haci entrega di certificado di Propedeuse na e 11 studiantenan.

Banda di esaki drs. Jumira Spier a otorga certificado na e studiantenan cu a completa nan fase integrativo awo conoci como Perspectiva Mundial. IPA a introduci shete docente nobo cu lo forma parti di e team dinamico di IPA cual ta dr. Rigoberto Croes, señora Rachelle Goedgedrag, drs. John Khodabux, dr. Paula Kibbelaar, Ingrid Lasten Msc, señora Nirina Paredes-Charris y Leontine Merkies.

A dedica un parti di e anochi pa honra e hubilarionan di IPA. E aña aki IPA tin diferente colega cu a haci sea 5, 10 y te hasta 20 aña trahando incansabel

na IPA: Gisele van Grieken 5 aña, Ingrid Captain-Fraser 5 aña, drs. Diahne Lejuez 5 aña, James van der Linde Msc 5 aña, drs. Shamira Tromp 5 aña, Mayra Kock-Garrido 10 aña, Frans Lacle 10 aña, drs. Renald Laing 10 aña, Jessica van der Linden Msc 10 aña, drs. Mirto Nicolaas 10 aña, Marina Werleman 10 aña, José Ramon Tod Dandare 20 aña, Pedro Velasquez 20 aña, Tina Nurse 20 aña y Emilio Thiel 20 aña. Tambe a despedi di colega drs. Irayka Yanez cu lo no ta den servicio di IPA mas.

Un tradicion di tur aña na IPA ta e eleccion di docente y colega di aña di IPA. Docente di aña 2012-2013 a keda den persona di drs. Mervine Kock, Ortopedagogo y docente di Matematica cu a keda elegi pa

su studiantenan y coleganan. Tambe a elegi colega di aña, cu ta inclui tur docente y personal di sosten di IPA. Colega di aña a keda den persona di señora Sandra Cotarelo-Idigoras, cu ta encarga cu administracion financier di IPA.

E anochi a termina cu un brindis ameno pa tur esnan presente. IPA ta gradici tur estudiante, docente, personal di sosten y invitado cu tabata presente riba e anochi aki y cu a forma parti di e apertura oficial di aña academico di e instituto. IPA ta spera cu e aña academico aki por ta un yen di logro y positivismo y ta desea e comunidad completo di IPA y enseñansa en general hopi exito den aña academico 2013-2014.